

NSA ‘ NGA NJÚ TE PA MFÉÉ KÊT MÚN NYŪTU

NJŪE ME SHŪKÉT

Lo’ te ka kúmshe nga wúme, yúe a njit ne gú púen te ngúet púen nyŭtu pua pa mféé kêr’ ap ngúenengúe sebe, pe na yire mbe map(ureyúe’ ne) kú ghét ngam pua sappé ne fúeshe te njú na, lo’ te ka fét kwen pua táne pa mféé kêt mún nyŭtu kpa’ nkiére gú ngétne nga pâre yúe a mfiébe

Wupme pa te njú na, pua ka tuo tuo njú mfé ira yúe púen nyŭtu ntuo pe ne kú shúkét pua kú wúshe te túm túme può pua ngúe’ , shi na mbe pô yi nsa’ me pum yu sha’ múm nyŭtu na,

Lo’ te ka a nta’ mi pa mféékét mún nyŭtu kpa’ mbe yu shí te nsa’ ngu mféékét me shi’ mi a me yétne yi njit mún nyŭtu me ndíni ne pi’ tu te nsa’ kpen pua yit mún te ngu na,

Lo’ te ka a ntó suo nshi’ shàne sun ma fàne túm túm ma,

Lo’ te ka, te mà kèn, túm túm te nda shut ngu ngu mbône kpa’ mbít nféére pentú yap te map map mféékét mún nyŭtu, lo’ te wúme pua nga’ két mbe mún nyŭtu, te ngúenengúe pa mféékét pemba pua pengbié mbi pit nsa’ ndíshut te yi ndùere tam kut te wume la’ pua yi mféére fuomkét fuomkét mmanjé wume te ndò lône kú ghét ngam ma.

Lo’ te ka gú nsa’ ngu ngu kpa’ nsèn te pamme mbuo pua nda nshút ngumbône, yi mbe ngum nshin pa mféékét mún nyŭtu pua map map kú ghét ngam ma,

Lo’ te ka yi nyéte mbuomshe shire shire pa mféékét pua pa kú ghékét ngam pe na pô nga ngúre te yi ngúre yire yi gbèt kèn nsebe na,

Puomshe Mbadem mún

na tupshe yire yi nsa’ nga njú, ti pa mféékét mún nyŭtu, po yúe wupme ndi nshur’ úe a nta’ mi gú túm túm pua ngu ngu yétne yi ngum pô nshin na, me shi’ mi gú púen ne gú pe kpúere púen te la’ , yúe pe nshùshú’ yire yi nsa’ ngam me wupme na, pe ne ma’ si’ te yu lére puo kúú wupme, a yétne fa pé, lo’ te ndi ngam membéte, túm te ngu ngu pua fàne ngu ngu, lo’ te kúmshe pua shétte te ngétne nga mbône mún nsebe ngúe ngúe me rú pa te ngu ngu nda shút puonepuo pua fàne nsié ngu ngu shúe pe nsa’ na.

Pum mgbetí 1

Pe nà mvé gú puen nyŭtu pô te mbe kú ghét ngam pua ngúenengúe mbe te wúme nsebe pua pa mféékét. Pen à ntúm te mbe kú rem ngam pua fabshe ngam, a nshi njír’ ap ne yi nshàne ngétne nga shap pô te wupme pontà.

Mgbetí mbète 2

Nshié mún yétne yi ngét kú ñwet te gú pa mféékét pua kú ghét ngam túm te yire yi nsa’ nga njú, shi mshié nsènte me túm, me ngup, me sù, me shùket, me nga nyinyi, me nda ntañ, ké mo’ nshié wupme túm lo’ te la’ ké lo’ te fàne púen’ e, lo’ te nkap, lo’ te vé ké lo’ te mo’ nshié mbe.

Mo’ nké nshié nsènte ntap ndo’ tèr’ i mo’ ngà shi te mgbète ntañ, mgbète kèn ké mgbète fàne túm túm ngu ké sà ngu múm nyŭtu, pa yúe yire ngu ké sà ngu mbe ne shùtu na, nshin nsa’ mo’ ngu na, shi pe ne kú ghét ngam ké mbe pô ne páshe shùtu na.

Mgbètí mbète 3

Nshié mún nyŭtu ghét mféé kêt wume, mféé kêt kú ghét ngam pua mféé kêt tènntúúm wume te mbe mi.

Mgbètí mbète 4

Mo’ nshié mún ntap ndo’ pe’ i mkpèn ké te mbe fa’ kpèn ne, me nga kà kpèn pua ntèn kpèn ka kpa’ njié kèn te gú mbe map mentèn na.

Mgbètí mbète 5

Mo’ nshié múm nyŭtu ntap ndo’ pi’ kwete’ i ngúe’ menduwan.

Mgbètí mbète 6

Nshié mún ghét mféé kêt wúme ntu nté ni pue nkèn te gú li’ mentèn.

Mgbètí mbète 7

Gú púen kpa’ na mbe pô ngúe ngúe mesù kèn mbi pit ngékét mféé kêt shi nsènte mbe te ka kèn ntúe’ she wap ngúenengúe na. Gú yap ghékét ngúenengúe mféé kêt ntúe’ she me shi’ yi nkú’ ranami yúe a nte pe nsùene yire nsa’ ngam ma, mo’ nké yétne yi nèn nshié rône yúe a nsùshe rane-mi na.

Mgbètí mbète 8

Nshié mún pua ne mféé kêt yi mfa ñwer’ i tu gú nda sa’ ngu yúe a yétne yi mfèr’ i te map map pa mféé kêr’ i túm te mà kèn ké kèn ngu.

Mgbètí mbète 9

Nshié mún mà njetne’ i yi mbe yu vé te kú tú mo’ mún, ké yi mshùshú’ i, ké yi ntúme’ i te ngu.

Mgbètí mbète 10

Nshié mún nyŭtu ghét mféé kêt, ngúenengúe nsebe, ne ka pe njetne yi nju’ mbie’ ne sa’ shi me ndò ngúere te nda sa’ shùtu shi nga rane-mi ntúúm ña yùe pe ntuo li sa, tupshe pa mféé kêr’ i pua kêr’ i na, ké yi ntupshe mgbú sa’ shi yúe a ntuo suo’ i ne sa’ na.

Mgbètí mbète 11

Nshié mún’ úe pe nsóme’ i na, pum na mbe ndi’ pô ngà gbú sa’ , kúka kèn ki’ re nguo kwete mgbú sa’ shi te nda sa’ , me ndò ngúere, ña yúe loya njétne yi mfèr’ i pòkéri na.

Pe ntap ndo’ suo’ i sa’ ndun nshié mún, lo’ te ngékét pua shu shi ghet ké shu shi rié, fú’ yié ka a ndi’ pô fubkèn túm te kèn ngu ke’ ken njú mansié. Mo’ nké shi pe mbi’ ndo’ njap nsuo sa’ ndun mún à rét nja’ yúe a pembi té mbe yi mgbète te fú’ fubkén na.

Mgbètí mbète 12

Nshié mún yié ndi’ yúe pe ndo’ mbe mbib’ i ne yi lo’ nyí te nga wumeshi yi’ she, pa nshut nda’ i, li’ shu’ i ké lérewa shi, shi ñúshe ntu nté mi pua ngétne nga shi yi mbòkét. Nshié mún nyŭtu ghét mféé kêt túe’ she lo’ puo kén meshi’ yi nkú yúe pe mbe mbib’ i ké yi mbe ñúshe’ i ne.

Mgbètí mbète 13

Nshié mún nyŭtu ghét mféé kêt ghét kú yi nkétne ne yi nsho’ li’ shu’ i (nka’ shi) te nshié ngu.

Nshié mún nyŭtu ghét mféé kêt yi ntúm nshié ngu, mbù ngu’ i, mbít nkú njétne yi mbùtne ntúúm.

Mgbètí mbète 14

Te ka pe mbe nta’ vé mún na, mbù i ghét mféé kêt yi nta’ li’ kebkebe mbit, nkú kwete li’ kebkebe te shimo’ ngu.

Yire yi mféé kêt ndi’ yu rié te pa vévé yúe mún ghét púú ngúre na, ké te ngétne nga yúe a ndi’ yùni pua nsa’ nga njú mansié na.

Mgbètí mbète 15

Nshié mún nyŭtu ghét mféé kêt yi mbe ntúmsié ndi la’ .

A ndi yétni ne yúe pe nkuot ntúmsié la’ puo mún, ké yúe pe nkuot mféé kêt yi kupshe ntúmsié la’ pue’ i nà.

Mgbètí mbète 16

Lo’ te lúm li,membà po memgbié nghétkét mféé kêt yi ndàme mbit njétne yi nsèn ngúet mún, shi tié nto’ ne nga túm, nga la’ púen ké nga nyinyi púen ne. Pe ghét két na mféé kêt te lam pô ngúenengúe, lo’ te wume lam pua fú’ yié ka pe ño lam ma.

Kutlam shu na pô te ndi nshut pua péeme pè’ ghà yi ndàme.

Ngúet mún pua nki map mbadem mún lo’ fem nshin mo’ nké mbi ghét mféé kêt kwete shi lo’ puo mbadem mún pua nsa’ ngu.

Mgbètí mbète 17

Nshié mún, yi’ she ké me rû pùen ne, ghét mféé kêt ghét kú yi yúm.

Pe mà njétní yi nvé mún nkuot kú yu’ i.

Mgbètí mbète 18

Nshié mún nyútu ghét mféé kêt kú rem ngam, yi, ne nga nyinyi; yire yi ntupshe yi ngét kú kupshe nga nyinyi ké ghét kú ghét nga nyinyi yi’ she ké te puomshe me ndóngùere ké me lúemshe, lo’ te yu lére, gû ngéri, fa ngùre ne nyinyi pua ghét gû mgbète ntuot nga nyinyi.

Mgbètí mbète 19

Nshié mún pua ne mféé kêt ghét kú ghét wupme ne yi nshúkére, yire yi ntupshe mféé kêt yi mbe shi yétne yi kwete nkamkét ngam me shi’ gû wupme shi ne mféé kêt yi njétne yi nta’ yi nkweite mbit nsam gû pesa’ kúe pua wupme te nshié manjé yi nsàme.

Mgbètí mbète 20

Nshié mún pua ne mféé kêt ghét kú ghét puomshe ne ghét nda nshút puomshe te fúeshe.

Pe fa pe yié yiri mún i pe mún nda puomshe.

Mgbètí mbète 21

Nshié mún ghét mféé kêt yi nshàre tésú te pesa’ kúe npa ngu’ i, ké me mún nténe, ké njem púenpúe pe sha’ sh sh na.

Nshié mún ghét mféé kêt yi ngét ntu nté te nsa’ ngu’ i lo’ te ngúenengúe mgbète kèn yi kwete.

Kú ntú pa te ngu pe na yire mbe meyúe’ ne (to’ she) ne pâwa nsa’ ngu. Yire yi kú ntúúm pe nâ yitkéri te nshôshî pô lo’ te shisho’ nzènkét te gû pe rap fù’ , ñère nshié mún sho’ yi ngúengúe yié momap, me lúem ké yúe pe nsho ’ mo’ nza fééni shi yít mún mbe na.

Mgbètí mbète 22

Nshié mún, me rû lala pa te ngu, ghét mféé kêt yi mbe ne tèn ntúúm wume mb ne mún. A nâ tèt ngâ shi lo’ te yi kwete lúúm ntúúm pa mféé kêt shúshú’ mbèt pam, fâne púen te la’ ne nga yi ntuot púen yúe a nkpa’ she njit te nga wúme shi na, pua nga lúere púnte ntu nté mi na, lo’ te ma’ si’ ngu pua shàne wume ngu ngu, mbe njùe’ ne te nga yi nsh she ne nga mbètpam nshié ngu.

Mgbètí mbète 23

Nshié mún nyútu ghét mféé kêt fa’ , kú sho’ fa’ shi, lo’ te mgbète fa’ yúe a pua yi ghapshe ngúe ngúe ne shìre lem túúm pua yi nèn manjé ne nga shu ndem na.

Gú pùen ghétkét mféé kêt ngúenengúe péé te ngúenengúe fa’ shi rane mi mbe.

Nshié ngâ fa’ ghét mféé kêt péé a pe yétni mbit mbe yi shìre ntúúm mbe nshàre’ i pua ngùr’ i te wume yúe a yùne pua wúme ndun mún nyútu na, nzishipe yi mbe nsham pa mebú’ re te shimo’ mmanjé yiéka a ntàne na.

Nshié mún ghét mféé kêt yi njùp nda nshút tùe’ she séé mbètpam pua shimo’ pùen mbi pit njétne yi nyi te shire shúe nda shút meshi’ tùe’ she séé shi.

Mgbètí mbète 24

Nshié mún ghét mféé kêt gbùne ñwet pua pa fône fú’ ndem ntamme pékét mgbète fú’ fa’ ne ngab ngab’ úe a pua yi péé te pe rap fú’ na.

Mgbètí mbète 25

Nshié mún pua ne mféé kêt kwete ntu nté wume njétne a pe yi fú’ she njap ñwet, nshu mbòkér’ i ne shi ngúer’ i, ntamme meshi’ njùpayù, ma’ shùe’ , nda nshu, yùre shi, làne pe fa’ fèt pùen te la’ , yúe pe ghét shèt nga shi na I ghét mféé kêt puo-ghàme nsa’ ngu me yúe i mbe shi fa’ na te ya na, ne kúlúemshe na, te kùú na, te réne na ké te shi mo’ mbe yúe kú wume sié puo’ i, lo’ te nkamkét ngam’ úe a ndi’ te kú ntú’ i na.

Nda vé pua pon kpa’ she ngét mféé kêt yi nkweite ghàme ne mfère yúe a pua shéttí na. Gû pon, mbù pon njem nâ ngum nshin ngúenengúe túe’ she pa te la’ .

Mgbètí mbète 26

Nshié mún nyútu ghét mféé kêt yu lére (kúú wupme). A nâ njit mi kúú wupme pe pô ndem ndem, nkúeshî yétne yi mbe yu lére me njiéshî (pum yu lére) yúe a pua meyúe’ ne mbit mbe nkparé’ na. Njiéshe yu lére pua pô yitkéri. Yu lére ntu mbue ne yi yi fa’ nâ njit mi pe sàm. mbe njit yùp ndalérewa ngutngùre me nsa’ ne ne púen me mfù’ kú ngur’ ap.

A nâ njit mi yu lére pe nshééne runkét fú’ she ntu nté mún nyútu ne suo kú yi mfa puô pa mféé kêt mún nyútu ne mkpara’ fône kú ghét ngam. A nâ njit lúere nju’ ngam mûmshe ne sun me fâne ngu ngu ne gû lap lap túm túm ké nga nyinyi, shi làne tamkut te ngétne nga nda shút ngu ngu mbône, meshi’ shúshú’ fúeshe.

Pa mvévé, te fakú, ghétkét mféé kêt yi nsho’ nga yu lére yúe pe yétne yi mfa ne pon pap na.

Mgbètí mbète 27

Nshié mún ghét mféé kêt yi ngum fúeshî tu wume ntuot mbône mún, yi nséé te pa ghére ntu mbue ne yi ndù’ nga wuo nkú sú te yi yu ghére pua ngambòkér’ i.

Nshié mún ghét mféé kêt yi kwete tùe’ she te séé nga ntuot pua mbètpam tùm te yu fù’ she yi yi yu ghére, yi yi yu tùete ke yi yi yu ghére ntu mbue yúe i ghét na.

Mgbètí mbète 28

Nshié mún ghét mféé kèr’ úe a mbe nsa’ lo’ te fâne púen pua ngu ngu, mgbète kèn kúka pa mféé kêt pua kú ghétkét ngam te yire yi nsa’ nga njú njetne yi mbe wumkéri ntúúm na.

Mgbètí mbète 29

mún nyútu ghét kup kup mfa mfe ndun mbône mún ña yúe a li mî fône pua runkét tamkut te ntu nté mi yétne yi mbe na.

Te rûne pa mféé kèr’ i pua lúúm ntúúm te kwete kú ghétkét nga shi, nshié mún nâ mkpem ñwor’ i te ndút ndút kén meshi’ wúme pua fa puô pa mféé kêt pua kú ghét ngam ne montâ a lo’ mfa pû ne ndù nga kúú wupme ngambòkét, mgbète nga nsa’ ngu ne nshubòkét mbadem mún te ngu shútu.

A mà njétni mi shire pa mféé kêt pua kú ghét ngam lo’ mbe mfa’ ne pua gû pa sha’ ne gû mgbète nsa’ ngam nda shút ngu ngu mbône.

Mgbètí mbète 30

Mo’ nshié me yúe’ ne lo’ te yire yi nsa’ ngam mà njetni suo kú nshié nsa’ ngu, lap lap pùen ké ndí mún ne, ne yi ngét nshié mféé kêt te ghét pesa’ kúe yúe pe fa a nyé’ re pa mféé kêt puo kú ghétkét ngam’ úe pe ntanke ntúúm ma.